

Podsticaj i državna pomoć u funkciji ekonomskog razvoja

BiH troši stotine miliona KM svake godine na stimulisanje zapošljavanja ili poticanje razvoja male privrede kroz razne programe. Ipak, opšti utisak javnosti i struke jeste da se ne vide dovoljno očekivani rezultati ovih mjera. Razlozi su dijelom i u složenom poslovnom ambijentu koji djeluje destimulativno na poduzetničke aktivnosti.

U sklopu ove politike ponuđeni su konkretni prijedlozi kako sa direktnog vida pomoći preći na indirektni vid pomoći i poticaja, kako bi se napravio bolji i povoljniji poslovni ambijent i kako bi poslodavac zaposlio radnika zato što mu zaista treba, a ne zato što mu neko nudi poticaj. Fokus u prijedlozima rješenja je stavljen na domen fiskalne politike, gdje se putem raznih olakšica, smanjivanja poreza na niže, a povećanja poreza na više plate, može stimulisati ekonomska aktivnost.

Autor: Faruk Hadžić

Zaštita djece bez roditeljskog staranja u Bosni i Hercegovini

Zaštita djece bez roditeljskog staranja je javna politika koja za cilj ima da, kao zagovarački instrument, posluži za unapređenje položaja djece bez roditeljskog staranja u Bosni i Hercegovini.

Svrha ovog dokumenta bila je da prikupi najnovije podatke o položaju djece bez roditeljskog staranja u Bosni i Hercegovini i o dostignućima u procesu reforme socijalne zaštite, kako bi, na osnovu zaključaka, dala preporuke o daljim koracima neophodnim za kvalitetniju zaštitu djece bez roditeljskog staranja. Krajnji cilj reforme sistema socijalne zaštite trebao bi biti stvaranje takvih uslova za djecu u svim oblicima brige u kojima im se može pružiti individualizirana briga i u kojima mogu doživjeti osnažujuće odnose neophodne za njihov razvoj, što je u osnovi prava djeteta na kvalitetnu brigu i zaštitu.

Dokument je namjenjen nosiocima izvršne i zakonodavne vlasti, kako bi na osnovu nalaza iznijetih u njemu mogli zagovarati bolji položaj ove grupe djece i izvršiti stvarne promjene, prije svega kroz izmjene i dopune zakona, podzakonskih akata i drugih propisa.

Autorica: Jasna Sofović

Reguliranje pitanja studentskog rada u Bosni i Hercegovini

Pravna neuređenost studentskog rada, kao sve češćeg oblika angažmana učenika i studenata, omogućava brojne malverzacije i diskriminaciju zaposlenih studenata, koji ne uživaju zaštitu na radu. Veliki problem predstavlja i pitanje plaćanja poreza i doprinosa, što je oblast u čije uređenje država, zbog zaštite vlastitih interesa, mora biti direktno uključena.

Bosna i Hercegovina još uvijek nije usvojila zakone koji bi pravno regulirali rad studenata, što je preduvjet za uspostavljanje zakonskih mehanizama kontrole obavljanja studentskih poslova. **Zakonskim uređenjem studentskog rada podrazumijeva se djelovanje kroz više dimenzija, uključujući donošenje nove zakonske regulative na način da se jasno definira studentski rad, spriječe poreske malverzacije, zaštite studentska prava, utvrdi minimalna satnica, te uspostave jasne i pravno definirane kontrole nad radom studentskih servisa i agencija koje se bave posredovanjem pri zapošljavanju studenata.**

Prema tome cilj ove javna politike usmjeren je u donošenje zakonske regulative iz oblasti studentskog rada kako bi se onemogućila diskriminacija u oblasti studentskog zapošljavanja i kako bi se regulirala pitanja socijalne i poreske politike.

Autorica: Maida Čehajić Čampara